



SLUŽBA ZA REVIZIJU FINANSIRANJA POLITIČKIH STRANAKA

Na osnovu člana 10. stav (1) Zakona o finansiranju političkih stranaka („Službeni glasnik BiH“, broj: 95/12 i 41/16), člana 25. Pravilnika o godišnjim finansijskim izvještajima političkih stranaka („Službeni glasnik BiH“, broj: 96/13, 89/16 i 5/22) i člana 12. Pravilnika o administrativnim procedurama pregleda, kontrole i revizije finansijskih izvještaja političkih stranaka („Službeni glasnik BiH“, broj: 103/08 i 5/22), izdajem

IZVJEŠTAJ O PREGLEDU GODIŠNJEG FINANSIJSKOG IZVJEŠTAJA ZA 2021. GODINU POLITIČKE ORGANIZACIJE „SOCIJALDEMOKRATE BOSNE I HERCEGOVINE“

Broj: 03-07-6-403/22
Sarajevo, 12.02.2024. godine

SADRŽAJ

MIŠLJENJE REVIZORA.....	3
1. UVOD.....	4
2. PREDSTAVLJANJE POLITIČKE STRANKE.....	4
3. OPIS PREGLEDA I KONTROLE FINANSIJSKOG IZVJEŠTAJA.....	5
Predmet pregleda i kontrole.....	5
Cilj pregleda i kontrole.....	5
Obim pregleda i kontrole.....	5
4. PRETHODNE KONTROLE I REVIZIJE.....	5
5. NALAZI I PREPORUKE.....	5
5.1 NALAZI.....	5
5.2 PREPORUKE.....	9

MIŠLJENJE REVIZORA

Služba za reviziju finansiranja političkih stranaka je izvršila pregled godišnjeg finansijskog izvještaja Političke organizacije „Socijaldemokrate Bosne i Hercegovine“ za 2021. godinu.

Rukovodstvo političke stranke je odgovorno za finansijske izvještaje, postupanje stranke u skladu sa odredbama Zakona o finansiranju političkih stranaka, te uspostavljanje efikasnog sistema internih kontrola.

Pregled smo obavili u skladu sa revizijskim standardima primjenjivim na angažmanu u pregledu. Ovi standardi zahtijevaju da planiramo i izvršimo pregled da bi dobili umjerenu pouzdanost da stranka nije značajno kršila odredbe Zakona o finansiranju političkih stranaka.

Pregled je ograničen na kontrolu godišnjeg finansijskog izvještaja političke stranke i primjenu analitičkih procedura na podacima iz finansijskih izvještaja, pa prema tome ne obezbjeđuju pouzdanost koja bi se dobila izvršenom revizijom u prostorijama stranke.

Pregledom godišnjeg finansijskog izvještaja za 2021. godinu, utvrđeno je da je Politička organizacija „Socijaldemokrate Bosne i Hercegovine“ prekršila odredbe člana 4. stav (1), člana 5. stav (4), člana 8. stav (4), člana 11. stav (1) i člana 12. stav (1) i stav (4) Zakona o finansiranju političkih stranaka.

Pregledom, odnosno kontrolom finansijskih izvještaja, osim gornjih napomena, nismo zapazili ništa značajno što bi ukazalo na nedostatke u finansijskom izvještaju ili na finansiranje ove političke stranke suprotno odredbama Zakona o finansiranju političkih stranaka.

1. UVOD

Služba za reviziju finansiranja političkih stranaka (u daljem tekstu: Služba za reviziju) je izvršila pregled godišnjeg finansijskog izvještaja Političke organizacije „Socijaldemokrate Bosne i Hercegovine“ za 2021. godinu.

Pregled i kontrola finansijskog izvještaja su provedeni u skladu sa članom 25. Pravilnika o godišnjim finansijskim izvještajima političkih stranaka i članom 2. Pravilnika o administrativnim procedurama pregleda, kontrole i revizije finansijskih izvještaja političkih stranaka.

Zbog činjenice da nije obavljena revizija u prostorijama političke stranke, postoji mogućnost da pojedine materijalno značajne greške ne budu otkrivene.

Prema podacima iz godišnjeg finansijskog izvještaja Politička organizacija „Socijaldemokrate Bosne i Hercegovine“ se finansirala iz sljedećih izvora:

R/B	Izvori finansiranja	Iznos	Struktura
		(KM)	(%)
1.	Članarina	7.474,50	6,89
2.	Prilozi fizičkih lica (3-a)	2.600,00	2,40
3.	Prilozi pravnih lica (3-b)	0,00	0,00
4.	Prihodi od imovine (3-c)	0,00	0,00
5.	Prihodi od dobiti preduzeća u vlasništvu političke stranke (3-d)	0,00	0,00
6.	Prihodi od poklona (3-e)	3.510,00	3,23
7.	Prihodi iz budžeta (3-f)	94.874,01	87,43
8.	Prihodi od propagande (3-g)	0,00	0,00
I	Ukupni prihodi (1-8)	108.458,51	99,95
II	Ostali prihodi i drugo	51,60	0,05
	Izvori finansiranja (I+II)	108.510,11	100,00

U godišnjem finansijskom izvještaju stranka je iskazala rashode u ukupnom iznosu od 98.511,69 KM.

2. PREDSTAVLJANJE POLITIČKE STRANKE

Naziv političke stranke: Politička organizacija „Socijaldemokrate Bosne i Hercegovine“. Skraćeni naziv: SDBiH.

Politička stranka je Rješenjem, broj: 032-0-Reg-19-001341 od 25.09.2019 godine upisana u registar kod Općinskog suda u Tuzli pod nazivom: Politička organizacija „Socijaldemokrate Bosne i Hercegovine“. Rješenjem Općinskog suda u Tuzli broj: 032-0-Reg-21-000986 od 02.07.2021. godine izvršen je upis promjene adrese sjedišta političke organizacije.

Sjedište političke stranke je u Tuzli, Turalibegova 22/1.

Ovlašteno lice za zastupanje Političke organizacije „Socijaldemokrate Bosne i Hercegovine“ je Enver Bijedić, predsjednik.

Lice ovlašteno za podnošenje finansijskih izvještaja za 2021. godinu je Husein Tokić.

Prema podacima iz godišnjeg finansijskog izvještaja za 2021. godinu, stranka ima sljedeće organizacione nivoe:

- Središnji ured,
- 2 kantonalne organizacije,
- 5 gradskih organizacija i

- 4 općinske organizacije.

3. OPIS PREGLEDA I KONTROLE FINANSIJSKOG IZVJEŠTAJA

Predmet pregleda i kontrole je godišnji finansijski izvještaj Političke organizacije „Socijaldemokrate Bosne i Hercegovine“ za 2021. godinu.

Cilj pregleda i kontrole je da revizor na bazi finansijskog izvještaja pokuša da ustanovi da li je politička stranka u izvještajnom periodu postupala u skladu sa odredbama Zakona o finansiranju političkih stranaka. Ukoliko revizor na bazi kontrole finansijskog izvještaja utvrdi određena kršenja navedenih zakona, ocjenjuje da li je potrebno izvršiti reviziju u prostorijama stranke da bi mogao izraziti mišljenje o tome da li se stranka finansirala u skladu sa Zakonom o finansiranju političkih stranaka.

Obim pregleda i kontrole finansijskih izvještaja Političke organizacije „Socijaldemokrate Bosne i Hercegovine“ obuhvata kontrolu i provođenje analitičkih procedura radi utvrđivanja usklađenosti podataka koje je stranka iskazala u finansijskom izvještaju sa odredbama Zakona o finansiranju političkih stranaka, odnosno usklađenosti izvora finansiranja i načina trošenja sredstava.

4. PRETHODNE KONTROLE I REVIZIJE

Nakon izvršenog pregleda godišnjeg finansijskog izvještaja za 2020. godinu, Služba za reviziju je izdala Izvještaj o pregledu sa mišljenjem revizora, nalazima revizije i preporukama stranci: da se ne finansira iz zabranjenih izvora, da poslovne knjige vodi u skladu sa računovodstvenim propisima, odnosno da uspostavi blagovremene i tačne evidencije o novčanim tokovima, prihodima, rashodima i obavezama stranke, da finansijske izvještaje koje podnosi Centralnoj izbornoj komisiji Bosne i Hercegovine popunjava u skladu sa Pravilnikom o godišnjim finansijskim izvještajima političkih stranaka, da obrati pažnju na ispravnost i vjerodostojnost knjigovodstvenih isprava i da poštuje i druge propise, prevashodno propise o poslovanju gotovim novcem.

Nerealizovane preporuke:

Na osnovu uočenih nedostataka u godišnjem finansijskom izvještaju za 2021. godinu, utvrđeno je da Politička organizacija „Socijaldemokrate Bosne i Hercegovine“ nije ispoštovala ranije date preporuke.

5. NALAZI I PREPORUKE

5.1 NALAZI

a) Politička organizacija „Socijaldemokrate Bosne i Hercegovine“ nije postupila u skladu sa odredbama člana 4. stav (1) Zakona o finansiranju političkih stranaka¹.

- (1) Politička stranka je u godišnjem finansijskom izvještaju iskazala ukupne troškove u iznosu od 98.511,69 KM. U Programu utroška sredstava za 2021. godinu, stranka je planirala ukupne troškove u iznosu od 80.800,00 KM.

Politička stranka Program utroška sredstava za 2021. godinu nije sačinila na način da obezbjeđuje transparentnost utrošenih sredstava, kao i njegovu uporedbu sa ostvarenim troškovima, odnosno isti nije analitičan. U Programu utroška, stranka je planirala samo sedam vrsta troškova, dok je u 2021. godini ostvarila 22 vrste troškova.

Uvidom u Program utroška sredstava za 2021. godinu, Služba za reviziju je utvrdila da je politička stranka prekoračila planirane troškove u ukupnom iznosu od 2.270,77 KM, i to:

¹ U skladu sa odredbom iz člana 4. stav (1) Zakona o finansiranju političkih stranaka, stranka finansijska sredstva iz člana 3. stav (1) ovog Zakona može koristiti isključivo za ostvarivanje ciljeva utvrđenih svojim programom i statutom.

troškove reprezentacije u iznosu od 1.584,15 KM i troškove ostalog materijala u iznosu od 686,62 KM.

Osim toga, analizom Programa utroška sredstava za 2021. godinu, Služba za reviziju je utvrdila da je stranka finansijska sredstva u iznosu od 17.093,92 KM utrošila mimo utvrđenog programa utroška sredstava na način da nije planirala troškove goriva i maziva, troškove sitnog inventara i auto guma, troškove poštarine i internet usluga, troškove održavanja opreme, troškove reklame i propagande, troškove amortizacije, troškove platnog prometa, troškove takse, novčane kazne i sl., troškove dnevnica i putnih troškova, troškove telefona (fiksni telefon), troškove knjigovodstvenih usluga, troškove komunalnih usluga, troškove prevoza, troškove usluga oglašavanja u dnevnim novinama i telefonske troškove i ptt usluge.

- (2) Uvidom u poslovne knjige utvrđeno je da je stranka imala troškove godišnje parking karte u iznosu od 400,00 KM i troškove goriva i maziva u iznosu od 153,00 KM. Imajući u vidu da stranka u svom vlasništvu ne posjeduje motorno vozilo, nije moglo biti utvrđeno u koju svrhu je izvršena nabavka navedenih sredstava, tj. u koju svrhu su utrošena finansijska sredstva stranke.

Na osnovu naprijed navedenog, utvrđeno je da je Politička organizacija „Socijaldemokrate Bosne i Hercegovine“ prekršila odredbe člana 4. stav (1) Zakona o finansiranju političkih stranaka, jer je finansijska sredstva u ukupnom iznosu od 19.364,69 KM utrošila mimo utvrđenog Programa utroška sredstava za 2021. godinu, dok za sredstva u iznosu od 553,00 KM nije moglo biti utvrđeno u koju svrhu su utrošena.

b) Politička stranka je prekršila odredbe člana 5. stav (4) i člana 8. stav (4) Zakona o finansiranju političkih stranaka.

- (1) Politička organizacija „Socijaldemokrate Bosne i Hercegovine“ nije u poslovnim knjigama evidentirala i u finansijskom izvještaju prijavila nenovčane donacije po osnovu besplatnog korištenja poslovnih prostora u Srebreniku, Gračanici i Zenici, čime je prekršila odredbe člana 5. stav (4) Zakona o finansiranju političkih stranaka.

- Prema podacima iz Izjava fizičkih lica Omić Mehmedalije i Bajraktarević Denisa, utvrđeno je da je stranka u 2021. godini u Srebreniku i Gračanici koristila prostorije u vlasništvu navedenih fizičkih lica bez naknade.
- Uvidom u Izjavu Muhdina Mujačića, direktora pravnog lica „PROCOM“ d.o.o. Tuzla, o korištenju prostora bez naknade, utvrđeno je da je Gradska organizacija SDBiH Zenica u toku 2021. godine, a u svrhu povremenog održavanja sastanaka koristila bez naknade prostorije u vlasništvu pravnog lica „PROCOM“ d.o.o. Tuzla na adresi Školska br. 10/2, Zenica.

Politička stranka je imala obavezu u godišnjem finansijskom izvještaju prijaviti nenovčane donacije pravnog lica „PROCOM“ d.o.o. Tuzla i fizičkih lica Omić Mehmedalije i Bajraktarević Denisa po osnovu besplatnog korištenja poslovnih prostora u 2021. godini.

- (2) Kontrolom godišnjeg finansijskog izvještaja, kao što je navedeno u stavu (1), utvrđeno je da je Politička organizacija „Socijaldemokrate Bosne i Hercegovine“ primila nenovčanu donaciju pravnog lica „PROCOM“ d.o.o. Tuzla koje je u toku 2021. godine imalo sklopljen ugovor o javnoj nabavci usluga sa organom izvršne vlasti čija je vrijednost veća od 10.000,00 KM, što je suprotno odredbama člana 8. stav (4) Zakona o finansiranju političkih stranaka.

Pravno lice „PROCOM“ d.o.o. Tuzla je sa Kantonalnom upravom za inspeksijske poslove Kantona Sarajevo zaključilo Okvirni sporazum broj: 14-03-11-00161/21-10 od 08.02.2021.

godine, ukupne vrijednosti 42.120,00 KM. U okviru ovog sporazuma, u 2021. godini je zaključen Ugovor o javnoj nabavci usluga, i to Ugovor o pružanju usluga tekućeg održavanja aplikacije „IBM Lotus Domino i Notes platforme“ Kantonalne uprave za inspeksijske poslove Kantona Sarajevo u ukupnom iznosu od 14.040,00 KM.

c) Politička organizacija „Socijaldemokrate Bosne i Hercegovine“ prekršila je odredbe člana 11. stav (1) i člana 12. stav (1) i stav (4) Zakona o finansiranju političkih stranaka.

Politička stranka nije vodila poslovne knjige u skladu sa računovodstvenim propisima, nije vodila pravilne i potpune evidencije o svojim prihodima, rashodima i obavezama, te obrasce godišnjeg finansijskog izvještaja nije popunila u skladu sa Pravilnikom o godišnjim finansijskim izvještajima političkih stranaka (u daljem tekstu: Pravilnik), čime je prekršila odredbe člana 11. stav (1) i člana 12. stav (1) i stav (4) Zakona o finansiranju političkih stranaka.

(1) Stranka u poslovnim knjigama nije uspostavila potpune i tačne evidencije o svojim prihodima iz budžeta i ostalim prihodima, te ih u finansijskom izvještaju nije prijavila u skladu sa odredbama člana 13. i 19. Pravilnika.

- Politička organizacija „Socijaldemokrate Bosne i Hercegovine“ je u obrascu 3 (izvori finansiranja) godišnjeg finansijskog izvještaja iskazala prihode u ukupnom iznosu od 108.510,11 KM, a iste je u poslovnim knjigama i Bilansu uspjeha iskazala u iznosu od 111.510,11 KM.

- Stranka je u godišnjem finansijskom izvještaju iskazala prihode iz budžeta u ukupnom iznosu od 94.874,01 KM, dok je u poslovnim knjigama iste iskazala u ukupnom iznosu od 97.874,01 KM, što je za 3.000,00 KM više u odnosu na ostvarene.

Uvidom u izvode sa transakcijskog računa utvrđeno je da je stranka primila sredstva iz budžeta Ministarstva finansija i trezora Bosne i Hercegovine na ime povrata takse za ovjeru učešća političke stranke na Lokalnim izborima 2020. godine u iznosu od 3.000,00 KM. Stranka je navedena sredstva trebala iskazati u obrascu 3 kao ostali prihodi.

Također, utvrđeno je da stranka nije u poslovnim knjigama uspostavila evidencije o prihodima iz budžeta po nivoima vlasti, već je sve prihode iz budžeta evidentirala na istoj analitičkoj kartici konta 411000. Stranka je imala obavezu da uspostavi analitičke evidencije o prihodima iz budžeta pojedinačno za svaki nivo vlasti (npr. Lukavac, Tuzla, Gradačac i sl.), kao pretpostavku za pravilno finansijsko izvještavanje.

(2) Stranka u poslovnim knjigama i godišnjem finansijskom izvještaju nije prijavila nenovčane donacije po osnovu besplatnog korištenja poslovnih prostorija u Srebreniku, Gračanici i Zenici, čime je prekršila odredbe člana 13. i 18. Pravilnika.

Takođe, utvrđeno je da je stranka pogrešno u obrascu 3-e godišnjeg finansijskog izvještaja iskazala nenovčanu donaciju pravnog lica Green Energy Solutions d.o.o. Sarajevo po osnovu besplatnog korištenja poslovnog prostora u Sarajevu, u ulici Marka Marulića br. 6 i komunalnih usluga koje su nastale prilikom korištenja istih.

Uvidom u dostavljenu dokumentaciju, utvrđeno je da je sva dugovanja po osnovu korištenja poslovnog prostora i komunalnih usluga u Sarajevu izmirilo fizičko lice Porović Saudin, te je isti u obrascu 3-e trebao biti evidentiran kao donator, a ne zakupodavac pravno lice Green Energy Solutions d.o.o. Sarajevo.

(3) Politička stranka u poslovnim knjigama nije uspostavila potpune i tačne evidencije o svojim rashodima, te ih u finansijskom izvještaju nije prijavila u skladu sa odredbama člana 21. i člana 22. Pravilnika.

- Stranka prilikom popunjavanja obrasca 4.1 (režijsko-administrativni i ostali troškovi) nije unijela tačne podatke o troškovima. Tako je troškove potrošnog materijala (*konto 400001*) u iznosu od 4.798,97 KM u godišnjem finansijskom izvještaju iskazala kao troškove ostalog materijala u iznosu od 6.886,62 KM.

-Politička stranka troškove zakupa poslovnih prostora nije evidentirala u momentu nastanka, već u momentu plaćanja obaveze, što za rezultat ima pogrešno iskazane rashode i obaveze u godišnjem finansijskom izvještaju i poslovnim knjigama stranke. Takođe, podaci koje je stranka iskazala u godišnjem finansijskom izvještaju ne odgovaraju podacima iz ugovora o zakupu poslovnih prostora niti podacima iz poslovnih knjiga.

U godišnjem finansijskom izvještaju Politička organizacija „Socijaldemokrate Bosne i Hercegovine“ je iskazala troškove zakupa poslovnih prostora u ukupnom iznosu od 33.747,45 KM.

Prema podacima iz ugovora o zakupu poslovnih prostorija u 2021. godini, koje je dostavila stranka, utvrđeno je da su troškovi zakupa poslovnih prostora u 2021. godini iznosili ukupno 55.835,71 KM.

1. Stranka nije u poslovnim knjigama i godišnjem finansijskom izvještaju iskazala troškove zakupa poslovnog prostora koje je koristila u Lukavcu u iznosu od 280,80 KM. Prema podacima koje je dostavio Grad Lukavac, Politička organizacija „Socijaldemokrate Bosne i Hercegovine“ je koristila poslovnu prostoriju u vlasništvu Grada Lukavca površine 23,40 m² po cijeni 1,00 KM/m², što za 12 mjeseci čini iznos od 280,80 KM. Stranka, takođe, nije prijavila troškove zakupa poslovnih prostora koje je koristila u Srebreniku, Gračanici i Zenici.
 2. Troškovi zakupa poslovnih prostora iskazani su u manjem iznosu u odnosu na stvarne troškove za sljedeće organizacione dijelove: Središnji ured u iznosu od 19.224,96 KM, GO Brčko Distrikt BiH u iznosu od 1.474,03 i KO Sarajevo u iznosu od 1.755,00 KM.
 3. Na osnovu raspoložive dokumentacije (pregled dostavljene dokumentacije, ugovori o zakupu i podaci sa analitičkih kartica), utvrđeno je da je stranka u poslovnim knjigama evidentirala i u godišnjem finansijskom izvještaju iskazala troškove zakupa poslovnih prostora u većem iznosu u odnosu na ugovorenu cijenu zakupa za poslovne prostore koje su koristili OO Banovići u iznosu od 47,34 KM i GO Živinice u iznosu od 614,19 KM.
- (4) Politička organizacija „Socijaldemokrate Bosne i Hercegovine“ u poslovnim knjigama nije uspostavila potpune i tačne evidencije o svojim obavezama, nije vršila usaglašavanje svojih obaveza sa dobavljačima, niti je u skladu sa odredbama člana 24. Pravilnika, u finansijskom izvještaju prijavila sve obaveze na dan 31.12.2021. godine.

U godišnjem finansijskom izvještaju stranka je iskazala ukupne obaveze u iznosu od 2.341,21 KM.

- Kontrolom iskazanih obaveza u obrascu 5.2 (ostale obaveze) utvrđeno je da politička stranka nije iskazala sve obaveze, te da podaci iskazani u obrascu 5.2 ne odgovaraju podacima iz poslovnih knjiga.

Stranka je u obrascu 5.2 iskazala obaveze u ukupnom iznosu od 2.341,21 KM, i to: obaveze prema dobavljačima u ukupnom iznosu od 978,09 KM i obaveze za bruto plate u iznosu od 1.363,12 KM.

Uvidom u analitičke kartice dobavljača utvrđeno je da su obaveze prema dobavljačima na dan 31.12.2021. godine iznosile 1.273,88 KM. Stranka je u godišnjem finansijskom izvještaju obaveze prema dobavljaču Centralno grijanje Tuzla iskazala u manjem iznosu za 4,21 KM, te nije iskazala obaveze prema sljedećim dobavljačima u ukupnom iznosu od 295,79 KM: Cvjećara „Ljiljan“ Gradačac u iznosu od 280,00 KM, „Facebook“ u iznosu od 2,40 KM, Vodovod i kanalizacija u iznosu od 11,59 KM i „Mamić“ d.o.o. u iznosu od 1,80 KM.

-Politička stranka u svojim poslovnim knjigama iskazuje obaveze prema dobavljaču „Telemach“ d.o.o. Sarajevo u iznosu od 195,50 KM, koliko je i iskazala u obrascu 5.2. Uvidom u Izvod otvorenih stavki na dan 31.12.2021. godine utvrđeno je da obaveze političke stranke prema dobavljaču „Telemach“ d.o.o. Sarajevo iznose 240,95 KM.

-S obzirom da nije iskazala sve troškove po osnovu zakupa poslovnih prostora, tako ni obaveze prema zakupodavcima nisu evidentirane u poslovnim knjigama i godišnjem finansijskom izvještaju.

(5) Uvidom u dostavljene fakture o zakupu poslovnog prostora u Tuzli², utvrđeno je da fakture nisu potpisane od strane korisnika usluga, niti su ovjerene za knjiženje i plaćanje od ovlaštenih osoba u političkoj stranci.

5.2 PREPORUKE

Preporučuje se Političkoj organizaciji „Socijaldemokrate Bosne i Hercegovine“ da se pridržava odredaba Zakona o finansiranju političkih stranaka, a posebno na osnovu uočenih nedostataka se preporučuje:

- *da sačini program utroška sredstava na način kojim bi se obezbijedila transparentnost planiranog trošenja sredstava, kao i uporedba ostvarenih troškova sa planiranim, te da finansijska sredstva obezbijedena za finansiranje stranke koristi u skladu sa programom utroška sredstava,*
- *da u skladu sa odredbom člana 5. stav (4) Zakona o finansiranju političkih stranaka, sve priloge prijavljuje u finansijskom izvještaju,*
- *da se ne finansira iz zabranjenih izvora,*
- *da vodi poslovne knjige u skladu sa računovodstvenim propisima, odnosno da uspostavi pravilne i potpune evidencije o prihodima, rashodima i obavezama,*
- *da finansijske izvještaje koje podnosi Centralnoj izbornoj komisiji BiH popunjava u skladu sa Pravilnikom o godišnjim finansijskim izvještajima političkih stranaka i*
- *da izvrši usaglašavanje obaveza sa dobavljačima, te provede odgovarajuća knjiženja u svojim poslovnim knjigama.*

KOMENTAR:

U ostavljenom roku, Politička organizacija „Socijaldemokrate Bosne i Hercegovine“ je dostavila odgovor na preporuke kojim se očituje da je saglasna sa nalazima revizije i mišljenjem revizora datim u Preliminarnom izvještaju o pregledu godišnjeg finansijskog izvještaja za 2021. godinu.

Šef Odsjeka za revizijske poslove

Sanja Tošović

Pomoćnik revizora

Rijad Selmanović

Šef Službe za reviziju

Mr.sc Hasida Gušić

² Fature JP BH Pošta d.o.o. Sarajevo.